

元豐類藁

十四



元豐類藁卷第二十四

制誥擬詞

吏部尚書制

尚書政本而吏部天官所以考擇人材以成天下之  
務近世既失其職但受成事而已今朕既正官名且  
將歸其屬任立法之始推行在人其於程能議功定  
勲頒爵當率厥屬謹循科條非得周材曷稱茲位其  
忠厚仁篤秉義守正列于侍從休有令名是用選而  
授之其務將明使朕所以作則垂憲不獨於今可行  
方當施之後世蓋汝有稱職之美則朕有知人之明  
尚其懋哉無替厥服

吏部侍郎制

尚書本天下之務而吏部典掌選舉至於所屬之曹  
有行封爵議勲庸稽功課之事咸以咨焉近世以來  
職分於他司而位爲虛器今朕董正治官使歸其名  
分豈虛爲哉固將循之以求其實蓋明紀綱定制  
以整百工熙庶績此朕志也侍郎實貳其長非獨當  
修其官且將推明新制以行今而傳後則其選授豈  
不重哉其文學行義有聞於時列于從官獻納惟允  
是用命爾實首茲選其體予所以擇而使爾之意務



祇厥服使政舉法行稱朕之意惟爾亦永有稱於後  
世可不勉歟

### 戶部尚書制

戶部之於中臺爲周官司徒之職掌財賦之調度金  
穀之出入以待邦國之用歷唐五代征斂煩興而使  
名雜出地官之職蓋存虛號而已今朕正名以定羣  
臣之位辨位以責庶務之實尚書政本典領經費之  
司所屬尤重博求天下之士以宜其官其誠篤強敏  
智慮精密董煩治劇材力有餘民曹上卿無以易汝  
理財之術待汝有爲今歲入甚廣而歲費所餘者無  
幾使官用有節而餘畜可致公藏贍足而民賦可輕  
在爾能知其方庶幾承朕之志尚懋爾守以承厥叙

### 戶部侍郎制

田疇生齒之籍穀帛貨泉之計下以制民之產上以  
經國之用地官之貳實參總焉朕方因能以用人正  
名以授職俾服予事必惟其材某頃以通敏之姿久  
更要劇之任徃副民部孰如汝宜夫知農之艱難而  
有以勸助視財之豐匱而有以均節使公藏贍足而  
私蓄美盈朕將觀爾之能爾其無懈于位

### 禮部尚書制

昔舜命伯夷典禮后夔典樂至周并爲宗伯之官今禮部尚書蓋其任也威儀度數之詳聲音律呂之別莫不屬焉精微之至所以統和天人順遂萬物其體可謂大矣矧今典領實又考擇天下之材夫能無曠其官以充吾所以寄屬之意歷選在位今得其人其明允直清知經信道制作之事舊惟討論春官古卿是用授汝朕承百王之敝方欲作則垂憲以成一代之典使五禮之節同於天地八音之和格於祖考天下智謀材諳之士得而用之待汝能稱其官庶幾輔予于治無懈于位以副朕知

禮部侍郎制

夫禮之節文樂之和聲所以成三材而育萬物典掌之任秩亞春官朕方考正百工之名而大修法度之政其於寄屬必惟其人其材出土倫學通經術宗伯之貳爾往欽哉其思先王制作之方而務知治民易俗之要其於理體非在於鍾鼓玉帛而已尚稱厥職以副予作則垂憲之心可

兵部尚書制

中臺政事所出兵部司馬之任所以典總師徒揚國威武至於按圖辨地駕乘庫兵司存之事莫不咨焉

今朕考古以正官儀將使處其名者必效其實由是以推朕之志明紀綱成法度焉八座之貴夫豈輕以屬人其明達事幾好謀能斷列于侍從忠益居多夏官古卿是用顯授朕患今之兵不與農合故因保伍之法修閱試之令庶夫使民知兵近於古義夫究宣朕意使吏能奉承而民皆嚮勸以共武之服時謂稱職可不勉歟

### 兵部侍郎制

夫兵天下之備誰能去之自士不出於井地而將非六事之人歷世以來皆知古之宜復而患夫勢之難行朕獨慨然有志於是故修保伍之令明戰陣之教先王之跡庶或可幾經營之勤心亦至矣惟是夏卿之亞實參典領之司方正官儀尤慎推擇其材敏忠篤明習治體圻父之貳往惟汝諧夫能獎誘務農之民悅趨講武之政馴致有漸而彌綸不踈惟無廢爾之勤可以輔朕之志尚思自勉以服訓詞

### 刑部尚書制

昔舜命臯陶曰汝作士明于五刑以弼五教蓋刑者所以助治而非致治之本也其縱入輕重得失之際人之舒慘繫焉此古之聖王所以未有不先慎罰也

今朕悉心以正庶官之任而中臺八座典司邦禁選用之體得人惟艱某明允通博資以術學服采于位厥聲顯聞秋官古卿是用命汝蓋前世之治斲雕爲璞破觚爲圜而憲網踈風俗美朕甚慕焉爾尚體朕之心折民以恕使辯訟自息而王政寔明可不勉歟以輔台德

刑部侍郎制

刑者所以禁人爲非而聖人一作王之所尤慎中臺總領之任秩貳秋官之崇朕方正名以稽羣吏之治而大修制度之文必惟其人俾服予采某慈恕忠篤明習法令參執邦典莫如汝宜夫能使民無冤亦已善矣推之可以至於使民無訟爾尚勉哉以承予綱紀四方之志

工部尚書制

昔舜咨于衆疇若子工羣臣薦垂徃祗厥序蓋繕修興造程衆藝飭五材國家之務不可以不屬之其人今中臺起曹實踐其任矧屯田虞衡平水之職莫不隸焉正名之初其選尤重其材力強敏周于計畫更閱內外時稱汝能俾服冬官蔽自朕志夫詳明品式以訓匠建事使費省於國力寬於人至於墾地山林

溝洫之政莫不畢舉皆汝守也其尚懋哉以率厥屬  
工部侍郎制

夫飭五材程匠事國家之務所不可已也故共工之  
貳任屬非輕朕乃若稽舊章財正官號思得智能之  
士以副采擇之詳其開達敏強明習典故冬官寵列  
俾介厥司考究制度之文紀綱修繕之政在爾能舉  
其職以稱吾經理萬事之心其尚懋哉往祇厥服

禮部制

朕正羣司之名而責其實歸天下之務而本之尚書  
故郎選甚高維春官之屬禮樂所出宜得智謀材諳  
之士以修厥官某業履望實見於世用考擇於衆莫  
如汝諧其尚體予董正治官之意於夫創制之初明  
紀綱興曠廢惟知其要乃能圖其詳其惟悉心以祇  
厥服

主客制

朕甚重郎吏之選欲以斂羣材責功實典客之任列  
於右曹維時門人宜服茲寵國家之有賞典所以待  
汝有為

膳部制

牲豆酒膳辨其儀數而修其政春官之屬郎秩甚寵



詢求材實爾允僉言尚思欽承以稱推擇

### 駕部制

輿馬輦乘之奉郵驛圉牧之治中臺要務主以郎曹  
敷求得人俾任吾事夫駟之頌養馬之詩也蓋其大  
旨曰思無邪然則為政之方斯可知矣能識於是夫  
何遠哉

### 庫部制

甲盾弓矢之器乘輿鹵簿之式武藏之任郎選甚高  
得士於朝屬任惟允夫稽功實以勸賞朕方必行悉  
忠力於事為爾尚無懈

### 都官制

係累春饍之人恤其廩給而申其訐競主以郎吏國  
之舊章爾惟惠慈宜蒞厥職尚思奮勵以稱東求

### 比部制

內外經費之事總於句考之司郎實主之位重省闈  
爾惟明敏宜能厥官惟時懋哉以服予訓

### 司門制

門關筦鍵之事啓閉出入之節總其籍賦而審其禁  
令郎官之任爾允詢求尚敏勞能朕將考察

### 屯田制

率屯戍之兵服畎畝之事所以益邊省饋佐國裕民  
郎於中臺總其政令用爾之敏宜能厥官徃服寵名  
無忘奮勵

虞部制

菟田有時而澤梁有禁虞衡之守所以遂嘉生而參  
化育中臺典領咸屬汝材其思順鳥獸草木之宜以  
稱朕愛人及物之意

水部制

川瀆隄防宣其利而備其害四方萬里之遠郎實總  
領秩甚寵焉爾以周材朕用選授夫知水之不可以

方五五

卷四

八

五

障而導之使行此成法也推而見之於事待爾能稱  
其官

御史中丞制

御史府持吾邦法所以糾官邪繩不恪輔予于治非  
秉義純篤望實敷于上下不稱其任其強毅肅括以  
提其身博學精識通于世用是以考擇于衆寵以茲  
位夫有守正向公之志又有能辨是非之明抗論於  
朝使賢不肖忠邪不失其實此法之所以爲治具而  
能佐吾以善養人之意使汝能宜其官則朕爲得其  
所屬尚體余訓其惟懋哉

知制誥授中司制

典掌明命總持憲綱非博學有文強毅忠篤曷可以  
兼斯任哉某志行清夷材資敏達更踐內外試用惟  
允論思禁掖肅正朝端蔽自朕知拔於不次惟明於  
體要可以見於訓辭惟公於是非可以施於刺督尚  
懋厥守方觀爾能

中司授太中大夫制

朕正名以定百官之位辨位以責庶務之實矧風憲  
之臣紀綱所屬曷可以不明其任哉某強敏開達一作  
篤仁學通古今擢典訓辭遂持邦法宜專分職以應新  
書是用進爾之階品在第四俾爾納忠宣力得壹意  
於中司以董齊衆工肅正內外庶余之作則更制罔  
或不虔在爾懋哉知其所守

責御史制

中執法所以糾官邪繩不恪也其可以自爲欺且怠  
歟某拔於疏遠之中服在此位宜殫忠力以稱所蒙  
而按劾大臣旣非其實稽其分職則自餒焉朕爲之  
優容俾從薄責而進對之際公肆誕謾屬吏推窮獄  
辭明具論其情則懷詐比其治則瘼官夫身任紀綱  
之司而抵冒若此雖朕欲貸汝而如公議何斥守偏

州尚仍階品往新厥志庶蓋前愆

### 御史遷郎官制

御史董攝綱紀肅正朝廷於政之有不當出于理於臣之有不協于極皆得言之故吾甚重其選選爾有列于此能勤厥職雖歲月未久而風望甚高今有司奏爾之課於法當遷吾不得留易之郎位使爾之自效能不擇官則吾於報功亦有異賞爾其勉之夫無忘訓言

### 御史知雜制

臺無大夫中丞則御史之首當專決庶政務實總邦憲朕選於衆然後屬之其人豈不重哉其以敏茂直清通于學問輟自右史往踐厥司夫振舉紀綱以闡明法度糾繩衰慝以肅正臣工朕方虚心志在於與人爲善爾能苦口無患於不得其言其尚自強以允公論

### 監察御史制

御史持國紀綱所以糾官邪齊內外選於衆而授厥惟艱哉爾好古知方強於自立刺察之任在其欽哉惟不回于爾心以無撓于余法在知所守可不勉歟

元豐類藁卷第二十五

制誥擬詞

祕書監制

帝王之治必有圖籍之藏又擇當世聰明拔出之士聚於其間使得漸磨文學之益獎成其材以待國家之用故書省之設吾不計近功而要於廣畜德所以厚其禮秩而艱於用人庶以明朕好古樂善之勤而勵學士大夫之行也其多識博聞操守純篤諸儒所尚令聞惟舊延處茲位蔽自朕知夫尊其所聞而行之不倦使輔於世教而其效可言非獨優游冊府而已在爾自強以承朕志

著作郎制

麟臺著作之任郎以詞學為之必惟其人爾以材選惟能明於理要乃見於文章其尚勉於厥修朕方觀汝之效

祕書郎制

祕藏四部之圖籍郎所守也職清秩美必也屬之其人爾以材稱俾服茲選尚惟敏於畜德朕方觀汝之能

正字制



是正文字之官實爲儒學之選宜體育材之意勉思畜德之勤

### 殿中監制

分職殿內參侍左右監總六尚之官以供服御之事位視九列禮秩甚優正名之初考擇惟慎其明習吏治勞閱有聞選於在廷俾踐厥任往其祇飭無忘訓詞

### 殿中丞制

丞於殿內參總六尚之官而察其稽失出於公選首以材升尚務欽承方觀汝效

### 太常丞制

丞於奉常參總禮樂之事祠祀之儀惟學古知方乃能不失其守尚務祇飭以服官箴

### 衛尉卿制

典領宿衛之官地親責重位在九列禮秩其隆考擇其人屬任惟慎其忠篤謹信濟以材敏周廬屯候之士武庫弓鎧之器往顓總治僉曰汝諧其尚懋哉以祇朕命

### 太僕卿制

書曰僕臣正厥后克正蓋親近左右有輔導之義矧

車府廐馬牧監之政莫不咨焉非得其人曷稱厥位  
其材質敏明久更器使司馭之選汝惟克諧其祗厥  
官以服朕命

### 大理卿制

折獄詳刑之事朕所重也典領之官位在九列正名  
之始選用非輕其明習吏治通於法令廷尉之任僉  
曰汝諧往其欽哉以率厥屬

少云參典之  
官位茲九列

### 國子祭酒司業制

學校之法雖使之通經術治文字然要其大致則在  
於明上之教以導民養人之材以成俗故師氏之位  
必惟其能其質性粹冲術業通博訓誨之任宜正寵  
名夫行其所知以先游學之士使風化之出自京師  
始待爾稱職可不懋哉

### 太學博士制

博士以文學為官往者列於成均其秩未正朕登之  
朝序所以尊庠序之教而勵士大夫也爾以經行選  
用往服厥官蓋尊其所聞以誘率學者汝之守也惟  
是懋哉

### 少府監制

百工伎巧之事展采備物之政典領之任位視列卿

正名之初考擇惟慎其明習吏治勞閱有聞選於僉  
言俾踐厥職尚其祗飭以服訓詞

### 軍器監制

繕治戎械訓工程作之任置監典領禮秩甚隆正名  
之初考擇惟慎其明習吏事勞閱有聞選於在廷俾  
踐厥位尚其祗飭以服訓詞

### 大宗正丞制

司宗之於國族門內之治也然合遠近之屬而齊之  
有不得專於愛者其於斟酌緩急恩義之際信難處  
哉故其屬有丞以參聽其事而交修其官考擇爾能  
俾在茲選夫親九族以刑萬邦此有國之先務也其  
體朕心徃從而長服茲辭訓以欽厥司

### 諸丞制

丞於有司參其政事而察其稽失以材選授尚懋爾  
勤

### 知開封府制

開封府朕建國焉天下所並湊衆大而俗雜尹正之  
寄非仁篤公勇材任煩劇不能稱其職今朕修定官  
儀正其名號固將考求其實使效見於事則用人之  
際豈輕也哉其爽邁開達練習治體閱試惟舊功用



顯白處以茲任莫如汝諸夫慈惠足以煦養惇弱剛嚴足以帖伏姦強然導民之方尚有可識使四方有以觀則而朕有以仰成在汝勉哉以稱朕命

開府儀同三司制

開府之於榮名重矣矧優其禮命視于三事故其品為第一所以隆崇大臣古今之通制也朕順于舊典考正官儀惟是首於文階是用制其祿入秩莫厚焉非時宗工夫豈虛授其材資桀異識慮闕深莊重足以鎮浮精明足以成務熙帝之載有贊元經體之庸提將之符有折衝綏遠之效今百揆攸叙方內靖嘉

時乃之功助朕致此是用峻其名秩申此寵章夫褒有功顯有德朕於尊獎近輔之心可謂至矣親百姓撫四夷爾於將順朕志之義可不懋哉尚體至懷徃承厥叙

開封府獄空轉官制

京師天下之聚俗雜五方之民至於智或侵愚強或凌弱巧偽滋出獄訟繁興統理之難為日已久其明敏開達曉習吏事輟自禁近蜀之尹正以公於奉上之志絕阿以附下之私摘發效欺動而必中彈治豪右勇於敢為使縲紲無非罪之嗟囹圄有空虛之效

求之近歲罕能及此聞于朕聽時惟汝嘉夫賞所以  
褒善而勸衆也進官一等曠爾之庸其尚懋哉以永  
來譽

樞密遷官加殿學士知州制

典國樞要之臣協相帷幄之謀彌綸疆場之事夙夜  
不懈風力施於省決精明用於思慮蓋勤且煩如是  
而歷時且久豈朕優禮耆舊之意歟其忠嘉惠和德  
操惟邵先帝所遺以輔朕躬當國本兵庶言惟允而  
屢辭幾政每請彌確志不可易朕所重違是用改進  
文階延升祕殿乃眷東夏處以近藩衍食真封併嘉  
寵數朕於隆崇近輔時其勞逸使得自擇出入之宜  
可以爲有恩矣爾於迺心王室罔以內外無忘益勵  
始終之節其可以不勉哉

侍讀制

蓋用儒學之臣入閣侍讀所以考質疑義非專誦習  
而已其列於分職始自開元而朕尤意嚮之其博通  
今古服在從官茲選甚高屬爾惟允朕以未聞於史  
者究觀前世之變而至夫理亂興壞之際未嘗不反  
復焉其悉所知以輔朕志是爲爾守其往欽哉

殿前都指揮使制

朕擇材勇之士備宮屯之兵以宿衛京師填拊方夏  
置帥殿陛屬之董齊非強毅忠勞閱試惟舊不在茲  
選豈非重歟其篤實沉雄明於策慮護邊制敵身有  
顯庸茲用命爾就列大廷典綏王旅建旄立纛爲國  
藩翰爰田真食並錫寵恩夫兵有擊刺射馭之能有  
坐作進退之法教習可以程其技節制可以閑其侮  
然能使之合心一力則在知所以附之能使之取威  
決勝則在知所以用之審如是焉厥惟艱矣蓋熟之  
於易所以圖其難得之於素所以應其變非造形而  
後定計非合戰而後屈人故師飽於逸而朝廷尊馬  
肥於休而夷狄叙惟予之武以無敵於四方則爾之  
良亦有聞於來世往遵辭訓以服厥官

使相制

在昔大雅所歌成周之盛呂侯申伯並爲國藩休父  
太師實將王旅出入踐更之雖異中外屏毗而則均  
時予宗臣分保近服蓋循斯義以告在廷某精慮造  
微翹材絕衆崇論閎議富于文辭強識博聞飽於術  
學繇禁林之獻納任廊廟之弼諧浸更歲時休有勞  
烈而屢形懇請願避煩幾雖敦譬之甚勤顧壯懷之  
難奪是用錫之土宇寵以節旄視宰路之等威益爰

田之恩數往釐東夏外倡庶邦予有式羣辟之典彝  
爾其底迪予有覃四方之德澤爾其布宣以夾輔於  
本朝以阜康於生齒配于前哲屬在老成其代天子  
矧又聞於大政迺心王室尚思告於嘉猷

### 節度使制

有地千里治兵與民內衛京師外拊疆場非文武器  
幹望臨一時朕所寵嘉不在茲選其溫良能斷沉靖  
善謀直道著於當官周材見於經務承流宣化善政  
有聞綏遠折衝壯猷彌顯是用錫之上宇授以節旄  
生齒寔繁屬爾以安輯師屯甚衆諉爾以訓齊以作  
朕股肱之良以爲國藩宣一作輔之重無忘忠力庶訖  
外庸惟亮天功待汝守四方之效無輕民事副予安  
百姓之心尚體眷懷豈煩多訓

### 節度加宣徽制

維昔牧伯長帥之官有土與民共于外服所以爲國  
藩輔今方鎮之任連數十城之地籍兵與衆而授之  
建旄立纛殿于大邦以作衛王室亦惟用稽于古非  
文武之特才擅一時孰能稱茲選哉厥有顯庸宜加  
寵命迺揚孚號以告庶位其莊毅足以任重肅括足  
以提身有能斷大事之明有克勤小物之慎考于僉

議付以成師宣化承流實裨治體折衝綏遠克暢武  
經故能紓朕之憂副人之望夫德茂者其賞異功隆  
者其報殊是疇其底績之勤錫以宣猷之號揆于常  
典非朕爾私蓋位重者其憂深祿富者其責厚名數  
禮秩朕既無忘爾之勞功實事爲爾尚協朕之志矧  
夫填臨塞路總領兵防班籍聯于輔臣謀畫參于國  
論其思勉勵以副眷懷

### 軍帥制

瓜牙之臣典領周衛非特強主威以鎮內外也蓋禮  
彌盛者備彌飾上下之節然也則任吾事者豈可以  
非其人哉某沉勇忠實勞閱有聞蔽自朕心俾共厥  
服仍遷位等其尚欽承

### 將軍制

朕有連營列校之衆以宿衛京師鎮撫諸夏能使士  
齊而奮其惟統督之臣求之在廷其選甚重某忠勇  
仁厚將以智謀使治吾軍必能副朕所屬今閱士之  
藝朕皆親臨拔其異能而汰其疲軟其於撫循訓勵  
之方可謂至矣爾於典領惟公賞罰可以服其心惟  
篤恩信可以致其力使處則有以養朕之威出則有  
以揚朕之武待爾任職稱朕意焉

都虞候制

士之以材武宿衛左右者其選其精而虞度候視於軍中者其任甚寵其忠勇有勞一作勞閱宜在此位進遷使號其往欽承一作勞實

都知制

門闈房闈之間朝夕給事非謹信忠篤烏可以處斯任哉其服勞左右閱歲已深淑慎厥躬朕所考察俾率厥屬往惟汝宜其思永于厥修尚終綏于榮祿

內臣制

給事長秋服勤惟舊今其老矣思就便安錄爾之勞宜進位等尚思祗服以稱朕恩

責帥制

朕拊士於閒暇之時蓋將責其效也至於臨敵逋亡朕雖假之以恩而將帥之臣則當濟之以肅使紀律章明然後威可厲而士可用也爾握兵之要宜知其職而潰卒之入煦煦受之勞問餉給如勞歸師使夫三軍之衆將何視焉有苟簡姑息之心無守正奉公之誼聞外之事朕孰賴哉議罪正刑有國之典奪其近職處以偏州尚自省循茲爲薄責

監司制

分部而使連數十城事之與奪吏之紕陟係焉古方伯之任也其選甚重固無假人爾修潔純明治行強敏刺督之寄徃共厥服夫能使政舉刑清和樂交於上下人足家給富饒洽於公私皆汝守也可不念哉

### 廣西轉運制

自既開百粵而地盡南海提封萬里莫不內屬本朝之制始分桂林以爲西部非獨鎮撫吾民亦以綏馭山居谷聚並海之蠻夷故將命而使其選常重爾嘗試而可是用任屬夫柔遠則能邇其務宣布上恩輯寧異土無失朕指徃欽厥司

### 蜀轉運判官制

西南之地延袤數千里外臨殊俗內雜谿谷諸蠻列州成縣以保安吾民境大人衆故蜀部爲四而利居其一最遠且險參於使事其選甚高求於在廷是用屬爾夫保民以仁而懷遠以德茲朕所嚮其徃欽哉

### 轉運使制

國家歲漕東南之粟以實京師故命使部之臣推擇能吏使度材具舟以濟其役爾應其選歲課甚優是用遷秩京司以爲爾寵朕於臣下之勤勞雖微且遠無所遺矣則爾之自效可不勉哉

陝西轉運使制

分部而使兼地數千里治兵與民與夫征賦之出入  
自陝以右一作西則又與疆場之事其於寄屬必惟其  
人察于在廷無以易爾夫使督課明而政事舉經畫  
當而財用足吏與士皆悅而勸兵與民皆贍而靖爾  
之任也其尚起哉

提舉常平制一

朕憫農之不易故擇材諳之臣分部四出以平其政  
令而佐其衣食之業爾以能聞當是任屬其務知朕  
之意在於惠民往慎厥司慰彼黎庶

提舉常平制二

朕憫夫農之艱且勤故詳為勸助之政又擇能吏分  
部四出使推而行之爾以材聞預在茲選其思宣布  
朕恩使敦本業之民安其田里而足於衣食則爾為  
能稱其職可不勉歟

元豐類藁卷第二十五



元豐類藁卷第二十六

制誥擬詞

知州制

昔先王之法導民以德齊之以禮而有耻且格後世不及然破觚以爲圜斲雕以爲璞禁罔踈闊而吏治蒸蒸不至於姦猶爲近古朕其慕之今能與吾共成此理者其惟循良之吏乎以爾爲能與在茲選使刑罰清而風俗美爾能善於其職則明考察而公賞勸朕豈貳於必行其尚自彊方觀爾效

知河陽制

盟津冀豫之域背河向洛成臯之間天下之重地也山川之固爲國屏翰分土而治非文武之特曷可以當選授哉某以材進拔閱試已孚俾仍近班往祗厥服有生齒之衆屬爾撫和有連營之師待爾綏輯尚茂循良之效庶寬西顧之憂

知軍制

開建城壁本以輯治軍旅今四方旣平而假守之臣實任民事列於有土之官矧朔北並邊寄屬尤慎爾以選擇往祗朕命夫能宣布恩威以拊循吾人而懷附異俗則爲善於其職尚思爾守

一作

效

無替訓辭

通判制

州有治中以攸助其長綱紀衆務舊矣今列城之守皆有貳焉蓋亦其任也爾以考擇往祗厥叙尚思稱職以報朕恩

罷館職加官制

夫爲官擇人處其名者必任其事而儒館之設有位號而無分職使學士大夫將何以效其實歟是用命爾進階一等而罷其虛稱其有異能朕將明試以功庶爾之材得施於用以成朕招俊乂康庶位之意焉其尚懋哉

賞功制一

王師西討爾能奮力行陣斬獻首馘稽諸賞典宜進官榮爾尚勉哉益圖來效

賞功制二

擐甲執兵人之重任賞信而速所以勸功爾爰整我師徂征西土大殲醜類來獻厥俘圖爾之勞進階一等尚思奮勵以佇異恩

團練使駙馬都尉制

大長公主吾姑也位號禮服褻崇光大國有彝章蓋其下嫁必得勲閥之門良能之士然後可以成先帝

愛育之仁而稱朕隆崇之誼其貴舊家子內外行完  
是用選見于廷命之進尚團兵重任倅馬美名兼而  
授之蓋稽故事夫恭儉靖慎可以保令問而綏寵祿  
茲惟朕訓汝尚勉哉

磨勘轉官制一

吏之在其位者積歲月之勤應有司之格必有甄進  
以明勸獎此國家之典也今序爾之勞遷位一等徃  
思祗服以稱朕恩

磨勘轉官制二

朕謹名分正官守以董齊百工至其有試用之勞無  
踐履之玷則皆稽其歲月法有甄進所以使吾勤事  
之吏知所勸也今有司比爾之課應於遷格宜升階  
品以允新書其服朕恩徃思來效

軍功制一

惟羗稔惡世盜西疆理將殄除內自生變致天之伐  
一作非朕敢私爾躬提偏師摧陷醜類震動河外宣  
明國威破竹之功成在旦夕賞不逾月朕尚遲之用  
遷爾官以勵衆士能殲大憝當有異恩

軍功制二

河外之地我之舊服羗能靖縱則以畀之今其將亡

自相戕害爰命計伐蓋將天威某沉勇有謀提兵以  
出獻俘斬馘屢奏厥功擢進使名以昭信賞能殲首  
惡尚有異恩

### 軍功制三

朕惟羗之猖狂內相賊殺致天之伐爰命六師止除  
罪人復吾故地而已爾握兵而出屢以捷聞蓋夫軍  
賞之行速則衆勸莫是用進爾之秩以激士心尚有不  
次之恩以待凱還之喜

### 新及第授官制

朕立學以養天下之材設科以進其造秀之士其於  
教導推擇欲成美俗於四方得羣能於庶位者可謂  
盡其意矣爾以經行文學選自朕躬命以一官將觀  
汝效往祗厥叙思稱朕恩

### 責將制

汝始以微功進朕不次用汝而屬之守邊乃冒吾法  
出蠻夷之中發人採金無出入之籍有侵盜之形朕  
惟不欲數使遠人煩於追逮繫獄也寧失汝罪不究  
窮之

### 堂後官轉官制

吾調兵于外而號令節制之繇中出者汝以宰屬與

於治文書赴期會能辦吾事進秩一等以獎爾勞尚  
思恪勤無墜厥守

詔

勸學詔

朕惟先王興庠序以風四方所以使學士大夫明其  
心也夫心無蔽故施之於已則身治而家齊推之於  
人則官修而政舉其流及遠則化民成俗常必繇之  
古之所以長人材厚人倫者本是而已朕甚慕之故  
設學校重學官之選而厚其祿凡欲以誘誨學者庶  
幾于古也而在位者無任職之心承業者無慕善之

志至於師生相冒挾賂爲姦器訟囂然駭于衆聽而  
况欲倡率訓導洽于禮義磨礱陶冶積於人心使方  
聞修潔之士充於朝廷孝悌忠篤之風行於鄉邑其  
可得乎朕甚憫焉故更制博士而講求所以訓厲之  
方定著於令以爲學制予樂育天下之才而庶幾先  
王之治者可謂至矣自今有敦行誼謹名節肅政教  
出入無悖明于經術者有司其以次升之使聞于朕  
將考擇而用之以勸于爾衆士有偷懦怠惰不循于  
教學不通明者博士吾所屬也其申之以誘導使其  
能有易於志而卒歸於善固吾之所受也予旣明立

學之教具爲科條其於學者有獎進退黜之格以昭勸戒至於學官其能明於教率而詳於考察有得人  
之稱則待以信賞若訓授無方而取舍失實亦將論  
其罰焉明以告爾朕言不欺尚其懋哉無詒爾悔

### 勸農詔

夫農衣食之所由出也生民之業莫重焉一夫之力  
所耕百畝養生送死與夫出賦稅給公上者皆取具  
焉不幸水旱螟螣之菑往往而有可謂勞且艱矣從  
政者知其如此故不違其時不奪其力以使之明時  
之因折以授之差地之腴瘠以處之春省耕秋省斂

以助之詩曰饁彼南畝田畯至喜言上所以勞之也  
又曰駿發爾私終三十里言上所以勸之也其獎勵  
成就之者如此朕自承天序內重司農之官外遣劭  
農之使爲之弛力役均地征修水利或一雨愆期則  
憂見於色或一穀不成則爲加惻怛有復除之科有  
賑恤之令夙夜孜孜焦心勞思者凡以爲農也今耕  
者衆矣而尚有未勉墾田廣矣而尚有未闢豈拊循  
勸率有所未備歟抑吏怠而忽不能宣究歟有司其  
於農桑之務益思所以除害興利詔令已具者無或  
壅闕所未盡者勿憚以聞要使緣南畝之民舉欣欣

然樂職安業治於富足稱朕意焉

正長各舉屬官誥

蓋聞堯之治曰百姓昭明舜之治曰四門穆穆然則當是之時在位皆君子其是非不惑可知也故堯欲釐百工舜欲熙帝載求可任者皆訪諸四岳因四岳以命禹又因禹以命稷契臯陶因羣臣之僉曰以命垂益伯夷因伯夷以命夔龍其審官用賢不自任其聰明而稽之于衆如此然存於書二帝所命者羲和九官十二牧皆官之正長也至於屬官則未有二帝嘗命之者其遺法之可考則周穆王命伯景為太僕

正戒之曰慎簡乃僚無以巧言令色便辟側媚其惟吉士則自擇其官之屬者官之正長之事此先王之成法也漢魏以來公府郡國亦皆自辟其屬而唐陸贄請使臺省長官自擇僚屬蓋上下之體相承如此以周天下之務此古今之通理也今朕董正治官始自三省至于百工皆正其名夫使在位皆君子而是非不惑此朕素所以厲士大夫也故凡官之長貳朕既考擇而任之尚書政本也自郎已下用吏甚衆其令僕射左右丞尚書侍郎各於其所部負有未備皆舉二人以聞朕將擇而用之其未用者亦識其名以

待用朕稽于古以正百官稽于衆以求天下之士其勤可謂至矣惟官之長貳之臣皆朕所屬以共成天下之治其尚體朕意所舉惟公以應朕之求所陳惟實以嚴朕之詔其得材失士有司其各以等差具爲賞罰之格朕將舉而行之賞吾不恪罰亦無捨非獨搜揚幽滯庶幾爲官得人亦將以觀吾大臣之能使朕得與衆士大夫合志同心以進天下之材作則垂法行之于今以詒後世追于先王之成憲無令唐虞有周專美于古不其美歟咨爾庶位其諭朕意一作懷

### 賜高麗詔

蓋聞昔在夏后分天下爲五服地有遠近故治有詳略而聲教之盛東漸于海朕甚慕之顧德不明何以逮此而爾東國之君款誠內附數遣使者乘不測之川獻其方貢惟爾之義朕實寵嘉宜有異恩以稱勤恪而爾比緣養病以醫爲請眷然東顧朕預憂之是用擇遣方技之官具舟以往爾惠彼一方神明相祚藥劑所補以時康寧達于予聞欣慶方屬而遽馳僚從來致謝章覽以慰懷獎歎良厚爾乃自祖以來保乂彼土其尚頤精神強飲食格于眉壽以均福于有衆使爾有世濟其美之功而朕預聲教及遠之休其



始自今永孚于好

策

擬代廷試進士策問三首

策問一

朕有志於卑漢唐之治而欲比跡於唐虞三代之盛故於書無所不學而通其意於天下之事無所不講而極其本末於人之材長養成就之者甚厚求而用之者甚至於民之務憂勤思念者甚詳撫而綏之者甚力患風俗之敝也正已以先百姓而明於教示患政理之陋也稽古以定制而謹於持循欲斥大疆

土也勞於經武欲懷附夷狄也廣於推恩人之所欲者不敢違人之所惡者不敢強賞不敢以喜而濫刑不敢以怒而淫羣臣之進對者夕請而朝見之四方之奏事者旦入而暮報之未嘗有聲色之娛未嘗有畋遊之好不營宮室不崇苑囿衣服飲食取具而已兢兢業業不敢暇逸日慎一日十有六年于茲矣惟先聖王之烈雖自視歆然察其用心如朕者亦可以無憾矣然古之大有爲之君必有大效於天下至於小能小善亦各有小補焉奚獨至於朕也意彌篤而功未見於人行彌勵而德未見於世豈所謂是者非

歟所謂能者否歟抑所行者爲可止歟所舍者爲可  
用歟將在位者奉承法令苟爲空文而不務究宣朕  
意歟意者今去古遠先王之政不可以復歟凡朕之  
所爲繇前者其失安在宜於今者先後施設其要如  
何唐虞三代之所以成功德者孰近於今可推而行  
之漢唐之卑者孰存於今可革而去之其悉心以對  
朕將自擇

策問二

夫有二南之化則有羔羊之大夫兔置之士漢廣之  
女其成人之材則見於思齊其成物之性則見於行

葦蓋王者之治繇近及遠其效如此何其風俗美而  
流澤深也今朕躬禮義以先天下恐其未諭也崇庠  
序以導之靡靡一作靡爵賞以勸之患其未從也以政率  
之以威董之可謂盡心矣然朝廷之臣未能有素絲  
之節正直之行中林之士未能有慎獨之心女子之  
誼未能有翹翹之絕況於有德有造成人之材牛羊  
勿踐遂物之性可望其鬣鬣乎朕於士民憊精刻一作  
克意以待其善而天下靡靡便文苟偷而已何其習  
之難變也夫先王之教其本豈易於身先之其具豈  
易於崇庠序靡靡爵賞修政刑以將之與今之所務者

同也然以今方古違從之效異何也豈今之所知者不明所尚者不審歟抑人散乂矣不可以復化歟子大夫待問于廷其以經對

策問三

朕獲承祖考懼德不明故小大之事躬親省決以夜繼日不敢自暇而政未加善側身踐行兢兢業業不敢自逸爲天下先而俗未加厚崇庠序之化信賞罰之法以開導而士未加勵憫農惠商補其乏闕除其疾苦以勸助而民未加富礪器械教士卒所以經營之者甚具而武事未立也定制度正官號所以彌綸

之者至備而文治未洽也至於百工未昭彝倫未叙四民未盡得其職萬物未盡遂其性中國之勢或詘於夷狄九州之地未一於舊服是一皆戾古豈朕之不敏所知者非其要所繇者失其統歟抑羣臣之在事者不稱其任不能輔朕歟將乖繆之習乂更革損益之始其功難見歟朕之待物者未嘗不以誠而下之應上者皆文具而已是何故也意朕之所爲與古之所以致治者無異而其效之不同何也二帝三王秦漢以來迄于唐及五代雖功德有間然其所以治且昌與夫所以衰亂失之者其跡可考其原必有在

方其治且昌也所繇之路本末先後其一致歟抑有  
殊也其衰亂失之也浸漸積累所以致之一揆而已  
邪抑不然也知古今明治亂子大夫之職也其具著  
于篇朕將親覽

元豐類藁卷第二十六





